

SOALAN NO.: 5

**DEWAN RAKYAT MALAYSIA
PERTANYAAN LISAN**

PERTANYAAN : LISAN

**DARIPADA : DATO' HASBULLAH BIN OSMAN
[GERIK]**

TARIKH : 20 MAC 2014

SOALAN : Dato' Hasbullah bin Osman [Gerik] minta **MENTERI SUMBER ASLI DAN ALAM SEKITAR** menyatakan sejauh manakah keberkesanan pemindahan gajah-gajah liar dari seluruh kawasan di Utara Semenanjung ke hutan Royal Belum dan hutan Temengor:-

- (a) kesan pada penempatan kampung Orang Asli dan Melayu di persekitarannya; dan
- (b) langkah jangka panjang untuk atasi masalah tersebut, contohnya usaha penempatan baru kawasan gajah (*sanctuary gajah*) di situ selain di Kuala Gandah, Pahang.

JAWAPAN:

Tuan Yang Dipertua,

Untuk makluman Ahli Yang Berhormat, sebanyak 56 aduan gangguan gajah telah diterima oleh pihak Jabatan PERHILITAN dalam tempoh 2010 - 2013 di sekitar kawasan *Royal Belum* dan Temenggor. Lokasi gangguan yang terlibat ialah Rancangan Penempatan Semula (RPS) Banun, Bersia, Felda Bersia Timur, Pos Kemar, Kompleks Perikanan Banding dan Stesen Janakuasa TNB. Kesemua aduan telah diambil tindakan oleh pihak Jabatan PERHILITAN dengan menjalankan operasi pemantauan dan kawalan secara tembak halau. Berdasarkan penemuan awal kajian pihak Jabatan PERHILITAN dengan kerjasama pihak *University of Nottingham*, Kampus Malaysia, mendapati pemindahan gajah konflik ke kawasan *Royal Belum* tidak mendatangkan masalah gangguan gajah terhadap penempatan kampung Orang Asli dan Melayu di kawasan tersebut.

Sebagai langkah jangka panjang untuk mengatasi masalah gangguan gajah di sekitar hutan *Royal Belum*, pihak Jabatan PERHILITAN telah melaksanakan satu projek pagar elektrik sepanjang 12 kilometer di RPS Banun pada tahun 2011. Analisis menunjukkan selepas pagar elektrik tersebut dibina, kadar aduan gangguan gajah di kawasan RPS Banun telah menurun sebanyak 40%. Pada tahun 2013 satu lagi projek pagar elektrik telah siap dibina di kawasan Bersia sepanjang 10 kilometer bagi mengatasi gangguan gajah di sekitar kawasan tersebut.

Buat masa ini pihak Kementerian tidak berhasrat untuk mewujudkan santuari gajah di *Royal Belum* bagi menempatkan gajah-gajah konflik yang dipindahkan. Namun pihak Kementerian menyambut baik dan menyokong penuh jika adanya cadangan pihak Kerajaan Negeri untuk mewujudkan santuari gajah tersebut dan dalam masa yang sama ia boleh dimajukan untuk tujuan tarikan pelancongan.

Sekian, terima kasih.